

[Augsburg], 30. August 1566

An Johannes Oporinus

UB Basel, Fr. Gr. I 11, fol. 288r.  
Steinmann Nr. 778.

S. P. D. Quia de omnibus nostris rebus et antehac, et nuper per D. Carinum, quem spero atque opto ad vos incolumen redijsse, et breui ad nos redditum esse, ad te scripsi: nunc sum breuior, et vnum illud significo, te, à M. Samuele Dilpomio, siue ministro, siue socio Willeri 54 f. accepturum, data tamen syngrapha, qua testeris nihil amplius vel à me, vel ab Augustana Republica tibi deberi pro ijs libris, quos superiore anno abs te accepi. Scripsi ad te proximis nondinis de supplendis defectibus, et quibusdam libris mittendis. Sed video te varietate negociorum ita distractum, vt minutijs istis vacare non possis. Itaque satis mihi factum putabo, si tibi satisfactum esse testatus fueris. De lucubrationibus meis, scito persuasissimum habere me et habuisse semper, nullum tibi esse anteponendum typographum vel industria vel studio et amore mei. A Dilpomio de Isocrate si impetrarisi, habebis commentariolos, vbi voles, non aspernandos, vt opinor: quos, ἐὰν θεὸς βίον παράσχοι καὶ εὐωδοίη, Caesari Max[imiliano] dedicabo. Volumen iustum erit, si Graeca cum Latinis coniungentur. Accendent gnomologiae vel potius ὅλος ὁ ἰσοκράτης γνωμολογηθεὶς κατὰ τόπους. Decreueram et φρασεολογίαν addere, quod ea quam edidisti, et inepta et falsa multis in locis est. Sed quia o<mni>um veterum oratorum τὰ τε πραγματικὰ καὶ τὰ λεκτικὰ in <>es conieci, quibus ordo tantum deest: in hoc non properandum esse puto. Demosthenem Graecum ante multos annos et annotationibus et correctionibus, vt potui, adornaui. Is tuus est, vbi vis. Latino relegendo hoc ipso die adieci animum. Cuius excudendi si cepisti consilium: habebis graecolatinum Demosthenem reuersus domum: qui erit prior tomus. Ad nondinas vernas, nisi me facta impedierint, commentariolos meos vna cum Vlpiano, qui erit alter tomus. Sed puto vtrunque eodem posse volumine coniungi, quod quidem, si tu volueris, erit magnificum, et Caesarea maiestate dignum, dignum etiam Oporino et Wolfio. Plura non scribo, nisi quod felicissima omnia tibi opto. Vale. 3 Cal[endas] Septembbris. 1566.

Hiero[nymus] Wolfius.  
T[uus].